

vel per accidens. Libro tertio Logicorum hoc obiter attingemus.

Affectiones thematis disjunctæ sunt, quæ conveniunt illi per divisionem: ut, quòd omne thema sit 1. verum vel fictum. 2. protonoëmaticum vel deuteronοëmaticum. 3. principale vel minùs principale.

Thema verum est rei existentis: fictum contra:

Ut, vita æterna est thema verum, purgatorium est fictum. Hic obiter observa, thema fictum esse vel otiosum, ut est limbus patrum; vel fructuosum, ut sunt multa figmenta poëtica, quæ ethicè, politicè & physicè explicata singularem habent usum; uti videre est in *Mythologiâ Natalis Comitæ*, & *Davidis Schrami Physicâ & Ethicâ*.

Thema protonοëmaticum est, quod exprimit notionem primam, ut *homo, cælum*: deuteronοëmaticum est, quod exprimit notionem secundam:

Ut, nominativus, metaphora, syllogismus, zodiacus. Notiones secundæ aliis dicuntur *secundæ cogitationes, secundò cogitata*, Platoni *λόγοι τεχνικοί*, Aristoteli *λόγοι καὶ ἐπισήμην*, Tertulliano *verba legitima*; in Glossario veteri dicuntur *axamenta*. Quid sit notio prima, quid secunda, in Metaphysicis docetur. Non itaque pertinet ad Logica præcepta hæc tractatio, sed ad commentaria, in quibus breviter hæc doctrina è primâ philosophiâ repetenda est. Notio in philosophiâ est conceptus mentis. Hic conceptus est tri-

Conceptus  
rei potest  
esse triplex.

plex, formalis, objectivus, & objectivus consequenter. Conceptus formalis, qui rem formaliter cognitam menti repræsentat. Vocatur formalis, quia repræsentat rem secundum realia attributa. Conceptus objectivus, est ipsum cognitum objectum, circa quod conceptus formalis versatur. Conceptus objectivus consequenter est, qui sequitur conceptum objectivum, tanquam umbra corpus. e. g. video hominem, quem mens mea concipit formaliter, dum actualiter convertitur in hominem, vel hominem convertit in se. Nam cognitio est assimilatio cognoscentis & cogniti. Perinde igitur est, sive dicas intellectiōnem, quâ intellectus canem co-